

DECLARACIÓN INSTITUCIONAL CO GALLO DO 25 DE NOVEMBRO de 2017, DIA INTERNACIONAL DA ELIMINACIÓN DA VIOLENCIA CONTRA AS MULLERES

As mulleres e os homes que formamos parte da corporación da Deputación da Coruña manifestamos que a violencia machista é un dos problemas máis graves ao que nos enfrontamos hoxe en día na nosa sociedade. Un tipo de violencia que sofren as mulleres polo simple feito de o seren, unha desigualdade silenciada, agochada e en moitos casos normalizada. Segundo os datos da última Macroenquisa de violencia contra as mulleres realizada no 2015 polo Ministerio de Sanidade, Servizos Sociais e Igualdade, un 13% das mulleres residentes en España de máis de 16 anos declaran ter sufrido violencia física ou sexual nalgún momento da súa vida por parte da parella ou exparella, un 26% violencia psicolóxica de control —ciúmes, control de horarios e actividades etc. e un 20% violencia psicolóxica emocional —insultos, intimidacións, ameazas verbais, etc. E constatando cifras tan alarmantes como que desde o ano 2010 até o que vai de 2017 hai constancia de 55 feminicidios só en Galicia.

A causa de todas estas violencias está directamente vinculada coa hexemonía aínda vixente na nosa sociedade dunha cultura patriarcal, a través da cal se reproducen os roles de xénero, os comportamentos discriminatorios e machistas e un sen fin de desigualdades sociais para as mulleres. Por iso mesmo, a súa erradicación esixe a posta en marcha de actuacións de carácter integral e transversal, que busquen transformar esta cultura e que promovan unha sociedade plenamente igualitaria. Tal e como teñen manifestado de forma reiterada os movementos de mulleres e feministas, é preciso tomar conciencia de que o machismo mata e fai imposible a convivencia requirida nunha democracia.

Este pleno, por unanimidade, considera que a loita contra este tipo de violencias debe ser unha prioridade institucional e política para todas as administracións públicas. No caso dos gobernos do estado e do goberno galego, parece claro que esta problemática ten que ocupar un lugar central na axenda política. A pesar de levar anos legislando a favor da igualdade de xénero, os resultados amosan que os esforzos realizados non foron suficientes e que é preciso recoñecer os erros e emendalos. Neste senso, é urxente mellorar o marco legal actual, entre outras cousas, revisando a propia definición de violencia de xénero e o seu alcance, recoñecendo xuridicamente o fenómeno do feminicidio e incluíndo apoio económico, psicolóxico e social tanto para as mulleres nesta situación como para os fillos e fillas, etc. Tamén é necesario que estas administracións destinen máis recursos públicos para a abordaxe desta problemática e que garantan o traballo en materia de igualdade no ámbito preventivo e educativo. Neste senso, unha vez máis instamos á Xunta de Galicia a que avance na concreción do Pacto galego contra as violencias machistas acordado por unanimidade polo Parlamento galego o pasado 25 de xaneiro, e que, en todo caso, comece por incrementar o orzamento de 2018 para a prevención e a loita contra todas as formas de violencia exercidas contra as mulleres co obxectivo de acadar o 1% do orzamento da Xunta.

A Deputación da Coruña comprométese a seguir incrementando os programas e recursos que pon actualmente a disposición dos concellos e entidades da provincia así como a colaborar e coordinarnos en todas as accións que se leven adiante desde os concellos, as entidades e o goberno galego. Nesta liña de colaboración tamén garantimos o noso apoio ás mobilizacións nacionais e locais que desenvolvan as organizacións feministas galegas contra a violencia machista os 365 días do ano.

O Voceiro do Grupo Provincial
PARTIDO POPULAR

O Voceiro do Grupo Provincial
PARTI- DO SOCIALISTA DE
GALICIA- PSOE

Asdo.: Agustín Hernández Fdez. de
Rojas

Asdo.: Bernardo Fernández
Piñeiro

O Voceiro do Grupo Provincial
BLOQUE NACIONALISTA GALEGO

O Voceiro do Grupo Provincial
MAREA ATLÁNTICA

Asdo.: Xosé Regueira Varela

Asdo.: Daniel Díaz Grandío

O Voceiro do Grupo Provincial
COMPOSTELA ABERTA

O Voceiro do Grupo Provincial
ALTERNATIVA DOS VECIÑOS

Asdo.: Manuel Dios Diz

Asdo.: Ángel García Seoane